

Boletín Oficial da Universidade de Santiago de Compostela

Ano II | Número 2 | 16 de febreiro de 2026

I. Disposicións xerais

Acordo 14/CG de 30 de xaneiro de 2026 polo que se aproba a modificación do Regulamento do Comité de Ética na Investigación da Universidade de Santiago de Compostela 2

Acordo 15/CG de 30 de xaneiro de 2026 polo que se ratifica a modificación do Regulamento de Réxime Interno da Escola Técnica Superior de Enxeñaría 6

IV. Outra información de interese para a comunidade universitaria

Resolución da xerencia da Universidade de Santiago de Compostela, do 16 de xaneiro de 2026, pola que se establece e aproba o plan secuencial de incorporación de remanentes de crédito derivados do exercicio 2025..... 8

I. DISPOSICIÓNS XERAIS

Acordo 14/CG de 30 de xaneiro de 2026 polo que se aproba a modificación do Regulamento do Comité de Ética na Investigación da Universidade de Santiago de Compostela

O Consello de Goberno na súa sesión ordinaria do día 29 de xuño de 2023 aprobou o Regulamento do Comité de Ética na investigación (CEI) da Universidade de Santiago de Compostela.

No seu texto figura como un dos grupos de traballo o de ética en investigación con axentes biolóxicos e organismos modificados xeneticamente.

Posteriormente o Consello de Goberno do 30 de abril de 20225 aprobou a creación do Comité de Bioseguridade da USC así como o seu Regulamento de funcionamento interno

Na actualidade, polo tanto, para a análise da investigación con axentes biolóxicos e organismos modificados xeneticamente existen un Grupo de traballo dentro do Comité de Ética e un Comité de Bioseguridade. Deste xeito considérase mais operativo que sexa o Comité de Bioseguridade o que informe os proxectos de investigación nesta materia e que non exista duplicidade nas análises sobre os proxectos de investigación realizados con este obxecto.

A estes efectos propónse modificar o Regulamento do Comité de Ética para que sexa o Comité de Bioseguridade o que informe sobre os proxectos de investigación con axentes biolóxicos e organismos modificados xeneticamente e eliminar o grupo específico sobre esta materia que existe na actualidade.

O artigo 3.a) do regulamento do Comité de Bioseguridade xa contempla, entre as súas competencias, a de asesorar aos distintos órganos da USC en relación coas actividades que impliquen o uso de axentes biolóxicos, incluídos os organismos modificados xeneticamente (OMX), informándolles das medidas de bioseguridade que cómpre adoptar e, de ser o caso, emitir os informes correspondentes.

Procede así modificar o artigo 5 do Regulamento do Comité de Ética no senso de incorporar o informe do Comité de Bioseguridade nos proxectos de investigación con axentes biolóxicos e organismos modificados xeneticamente e suprimir, no artigo 9, o grupo de traballo do CEI sobre esta materia.

Por outra banda, o Real Decreto 905/2025, de 7 de outubro, polo que se modifican diversos reais decretos en materia universitaria, inclúe no seu artigo 9 a obriga de creación dun “Comité de aseguramiento del comportamiento ético en el desarrollo de la investigación y la transferencia del personal docente e investigador”. Considérase que transitoriamente e en tanto no se desenvolvan as funcións deste comité na USC, procede que sexa o Comité de Ética na Investigación a que realice as funcións encomendadas por esta norma.

En consecuencia, O Consello de Goberno, na súa reunión do 30 de xaneiro de 2026, acordou aprobar a modificación do Regulamento do Comité de Ética na investigación (CEI) da Universidade de Santiago de Compostela.

Artigo 1. Modificación do artigo 5 do Regulamento do Comité de Ética na investigación da Universidade de Santiago de Compostela.

O artigo 5 do Regulamento do Comité de Ética na investigación (CEI) da Universidade de Santiago de Compostela queda redactado do seguinte xeito

Artigo 5. Composición.

1. O CEI estará composto por

- a) Tres membros do PDI con experiencia en áreas de investigación e práctica docente que impliquen a realización de tarefas de investigación con seres humanos.
- b) Dous membros do PDI con experiencia en áreas de investigación e práctica docente que impliquen a realización de tarefas de investigación con diferentes especies animais.
- c) Un membro do PDI con experiencia en áreas de investigación e práctica docente con axentes biolóxicos e organismos modificados xeneticamente.
- d) Un membro do PDI con experiencia en áreas de investigación e práctica docente no ámbito das tecnoloxías de intelixencia artificial.
- e) Un membro do PDI con experiencia en áreas de investigación e práctica docente no ámbito das tecnoloxías emerxentes na investigación en saúde.
- f) O veterinario ou veterinaria que supervise os animalarios nos campus de Santiago e Lugo.
- h) As persoas responsables dos animalarios nos campus de Santiago e Lugo.

2. O CEI solicitará o asesoramento dun experto ou experta externo á USC con coñecementos en benestar animal cando o obxecto das investigacións sobre as que se deba emitir informe implique a experimentación con animais.

3. O CEI solicitará informe preceptivo e vinculante ao Comité de Bioseguridade da USC cando se trate de proxectos de investigación con axentes biolóxicos e organismos modificados xeneticamente

4. O CEI solicitará o asesoramento do delegado ou delegada de protección de datos da USC ou persoa que designe cando o obxecto das investigacións sobre as que haxa que emitir informe implique o tratamento de datos persoais.

5. Cando o CEI o considere oportuno, poderá solicitar o asesoramento de expertos externos que participarán con voz pero sen voto.

Artigo 2. Modificación do artigo 9 do Regulamento do Comité de Ética na investigación da Universidade de Santiago de Compostela.

O artigo 9 do Regulamento do Comité de Ética na investigación (CEI) da Universidade de Santiago de Compostela modifícase e queda redactado do seguinte xeito:

Artigo 9. Grupos de traballo do CEI.

1. O CEI poderá crear os grupos de traballo, temporais, que considere convenientes para levar a cabo as tarefas encomendadas. Así mesmo, poderá requirir o informe, a colaboración ou a comparecencia de expertos para asesorar tecnicamente ao CEI en materias da súa competencia, que deberán comprometerse a gardar a confidencialidade dos asuntos tratados.
2. O nomeamento das persoas que integren os grupos de traballo corresponderá ao reitor, a proposta do CEI. Estas persoas deberán contar cos coñecementos técnicos requiridos para a correcta realización das funcións que lles corresponden na materia de que se trate.
3. Os documentos elaborados polos membros do grupo de traballo ou polos expertos non terán carácter vinculante para o CEI, e este poderá apartarse deles de xeito motivado.
4. O CEI contara cos seguintes grupos de traballo permanentes:
 - a) Grupo de ética en investigación con seres humanos.
 - b) Grupo de ética en experimentación animal.
 - c) Grupo de ética en investigación en intelixencia artificial e tecnoloxías emerxentes.
 - d) Grupo de ética na investigación levada a cabo con fins docentes.
5. O presidente ou presidenta do CEI designará unha persoa coordinadora de entre os membros de cada grupo de traballo.
6. Necesariamente, formará parte do grupo de ética en investigación con seres humanos un experto en materia de protección de datos.
7. Necesariamente, formará parte do grupo de ética en investigación con axentes biolóxicos e organismos modificados xeneticamente un experto en materia de prevención de riscos laborais.

Artigo 3. Modificación do artigo 16 do Regulamento do Comité de Ética na investigación da Universidade de Santiago de Compostela.

Modifícase o artigo 16 do Regulamento engadindo un novo apartado 2. ao texto do seguinte teor literal:

Artigo 16. Petición de informes

(...)

2. Para os proxectos e traballos de investigación comprendidos no ámbito material de actuación do Comité de Ética que impliquen o uso de axentes biolóxicos, incluídos os organismos modificados xeneticamente (OMX) presentárase unha única solicitude ante o Comité de Ética, quen deberá solicitar o informe ao Comité de Bioseguridade conforme ao establecido no artigo 5.3 do presente regulamento.

Artigo 4. Disposición transitoria.

Inclúese a seguinte disposición transitoria:

Disposición transitoria.- Comité de aseguramento do comportamento ético no desenvolvemento

da investigación e a transferencia do persoal docente e investigador.

En tanto a USC non desenvolva o establecido no artigo 19 do Real Decreto 905/2025, de 7 de outubro, as funcións establecidas por este precepto serán realizadas transitoriamente polo Comité de Ética na Investigación da USC.

Disposición final. Entrada en vigor.

O presente acordo entrará en vigor ao día seguinte da súa publicación no Boletín Oficial da Universidade de Santiago de Compostela (BOUSC)

I. DISPOSICIÓNS XERAIS

Acordo 15/CG de 30 de xaneiro de 2026 polo que se ratifica a modificación do Regulamento de Réxime Interno da Escola Técnica Superior de Enxeñaría

Na reunión de Xunta de Escola do día 18 de decembro de 2025 acordouse aprobar as seguintes modificacións do Regulamento de Réxime Interno da Escola Técnica Superior de Enxeñaría. Os cambios veñen derivados principalmente polo novo Regulamento de Mobilidade da USC aprobado en Consello de Goberno de 23 de xullo de 2025 que contemplaba a posible creación dunha Comisión de Internacionalización do Centro. Asemade aproveitouse para engadir pequenas modificacións na regulación da representación do estudantado a proposta dos seus membros. Finalmente se modificou o sistema de elección das comisións establecendo un procedemento non so para as comisións delegadas como figuraba na versión anterior senón tamén para o resto das comisións que contempla o regulamento.

En consecuencia, O Consello de Goberno, na súa reunión do 30 de xaneiro de 2026, acordou ratificar a modificación do Regulamento de Réxime Interno da Escola Técnica Superior de Enxeñaría.

Artigo 1. Modificación do artigo 9 do Regulamento de Réxime Interno da Escola Técnica Superior de Enxeñaría.

O artigo 9 do Regulamento queda redactado do seguinte xeito

Artigo 9.

A Dirección é o órgano unipersoal de dirección executiva e de xestión do Centro. Representa á Escola, preside os seus órganos colexiados, agás a Representación do estudantado, e executa os acordos destes.

Artigo 2. Modificación do artigo 10, apartado b), do Regulamento de Réxime Interno da Escola Técnica Superior de Enxeñaría.

O artigo 10, apartado b, do Regulamento queda redactado do seguinte xeito:

Artigo 10.

b). A presidencia das reunións da Xunta de Escola e de calquera outro órgano colexiado dela, agás a Representación do Estudantado, así como a execución dos seus acordos.

Artigo 3. Renumeración dos artigos a partir do número 22 ao engadir como novo artigo 22 a Comisión de Internacionalización do Centro (CIC).

Artigo 4. Modificación do artigo 27 do Regulamento de Réxime Interno da Escola Técnica Superior de Enxeñaría

O artigo 27 do Regulamento queda redactado do seguinte xeito:

Artigo 27.

Representación do estudantado

A Representación do Estudantado é o órgano colexiado de coordinación das labores de representación estudiantil na Escola Técnica Superior de Enxeñaría.

1. O estudantado de grao elixirá dous voceiros (delegada/o e subdelegada/o de curso) por curso en cada unha das titulacións de grao impartidas no Centro. Para as titulacións de máster o seu estudantado elixirán como mínimo un delegado/a.

2. Representación do Estudantado estará formada exclusivamente polos/as representantes do estudantado da Escola en órganos colexiados.

3.Competencias:

a) Elixir, entre os seus membros, unha Presidencia e unha Secretaría.

b) Elaborar un Regulamento, que deberá ser aprobado por maioría absoluta dos seus membros e ratificado pola Xunta de Escola.

c) Proponer, coordinar e programar actividades de carácter xeral do estudantado da Escola. As actividades poden ser propostas por iniciativa da Representación ou dalgún membro da Escola.

d) Canalizar as peticións, iniciativas e suxestións do estudantado verbo de distintos aspectos do funcionamento do Centro, que poderán ser presentadas polos representantes legais do estudantado aos órganos competentes.

e) Calquera outra función que lle asigne o seu Regulamento e que non supoña unha intromisión nas competencias dos representantes legais do estudantado

Artigo 5. Engadido na disposición derradeira

Engádese na disposición derradeira:

A modificación do presente Regulamento entrará en vigor coa súa publicación no BOUSC.

Artigo 6. Modificación do Anexo e eliminación do mesmo do Sistema de Elección

O Anexo queda redactado do seguinte xeito:

Anexo

Normas xerais para a elección de comisións da ETSE

Todas/os as/os representantes nas Comisións delegadas deben ser membros da Xunta de Escola e a elección farana para cada sector os respectivos membros na Xunta de Escola e para o resto das comisións votarán todos os membros da Xunta de Escola.

Para todos os sectores elixiranse os membros máis votados.

Os empates resolveranse aplicando sucesivamente os criterios de maior categoría profesional, maior antigüidade na categoría e idade.

IV. OUTRA INFORMACIÓN DE INTERESE PARA A COMUNIDADE UNIVERSITARIA

Resolución da xerencia da Universidade de Santiago de Compostela, do 16 de xaneiro de 2026, pola que se establece e aproba o plan secuencial de incorporación de remanentes de crédito derivados do exercicio 2025

De acordo co principio de especialidade temporal dos créditos en materia orzamentaria, con carácter xeral e salvo as excepcións contidas na normativa económico-financeira vixente, no estado de gastos de cada orzamento só poderán contraerse obrigas referidas a actuacións ou prestacións que se realicen no propio exercicio, resultando anulados de pleno dereito aqueles créditos que no derradeiro día do mesmo non estean afectados ao cumprimento de obrigas xa recoñecidas.

Porén, a dita normativa económico-financeira permite á incorporación de créditos ao orzamento tal e como se deduce da regulación homoxénea establecida polos artigos 58 da Lei 47/2003, do 26 de novembro, Xeral Orzamentaria; artigo 71 do Decreto lexislativo 1/1999, do 7 de outubro, polo que se aproba o texto refundido da Lei de réxime financeiro e orzamentario de Galicia e, no ámbito da regulamentación propia, o artigo 33 do Regulamento de xestión orzamentaria da USC do 29 de decembro de 2020 (en diante, Regulamento).

Así mesmo, na incorporación de créditos efectuada dende a entrada en vigor da Lei 2/2011, do 16 de xuño, de disciplina orzamentaria e sustentabilidade financeira, a Universidade de Santiago de Compostela (USC) veu realizando diversos axustes, co fin de se adaptar ao previsto nesta norma.

A USC debe manter o equilibrio orzamentario, evitando incorrer nunha situación de déficit orzamentario, axustando o gasto en función dos ingresos.

Neste ano 2026 son de aplicación as regras fiscais que limitan o gasto e os resultados nas Administracións Públicas, estando fixada a taxa de referencia para o ano 2026 no 3,5%.

Por outra banda, a Lei Orgánica 2/2012, de 27 de abril, de Estabilidade Orzamentaria e Sustentabilidade Financeira, establece mecanismos para evitar ou restituír as situacións diferentes da propia estabilidade orzamentaria ou sustentabilidade financeira. Para determinar ambas situacións empréganse criterios de contabilidade nacional, que non diferencian para eses efectos os créditos afectados dos non afectados. Entre os primeiros sitúanse a maior parte dos créditos finalistas empregados para financiar a actividade investigadora.

As reformas lexislativas no ámbito laboral e a modificación da Lei 14/2011, da Ciencia, a Tecnoloxía e a Innovación, a través da Lei 17/2022 motivaron a creación na USC dos Programas propios de investigación (estruturais, agrupados e específicos) e liñas de investigación que se vinculan aos ditos programas, como un mecanismo que permitira dar resposta ás novas esixencias de xestión.

Ademais do anterior, a Universidade acóllese ao previsto no artigo 101 e seguintes da Lei 37/1992 do Imposto sobre o Valor Engadido, de xeito que opera con sectores diferenciados na dedución do IVE, do cal se deriva que os créditos dun sector non deben empregarse para gastos noutro sector con réximes de dedución de IVE diferentes. O incumprimento deste criterio pode ocasionar sancións económicas para o conxunto da Universidade tras as inspeccións anuais deste imposto.

En aplicación do indicado, resulta preciso delimitar a tramitación do plan secuencial a seguir no proceso de incorporación dos remanentes de crédito e o uso de créditos que se derivan da actividade investigadora e que perderon a condición de afectación a un proxecto ou actividade singular.

Entre os diferentes supostos normativos nos que se permite incorporar crédito prevalecen os dous que se recollen no artigo 33, parágrafo 2º do Regulamento, que se refiren a :

- Partidas de gasto con financiamento afectado, sempre que a súa vixencia se estenda máis alá da fin do exercicio.
- Gastos vinculados a programas propios da USC definidos polos seus órganos de goberno, durante o período de vixencia para o cal fosen aprobados.

Fóra deses dous casos de aplicación preferente e automática, de acordo co apartado 3º do dito artigo 33 do Regulamento, permítese con certos condicionantes a incorporación potestativa doutros créditos que se financiarán mediante o remanente non afectado da tesouraría, de ser o caso.

As incorporacións de remanentes de crédito susceptibles de seren autorizadas terán validez exclusivamente no exercicio en que se acorde a incorporación, a excepción dos que correspondan a créditos con financiamento afectado ou finalista que se poderán incorporar sucesivamente, en canto persista o dereito á percepción dos ingresos que os financien ou a vixencia da actividade financiada.

En virtude do plan secuencial para a incorporación de remanentes establecido nesta resolución, e seguindo a orde de prelación que nela se aproba, leváranse a cabo as posteriores modificacións orzamentarias referidas a cada un dos créditos que se autoricen, e darase conta ao Consello de Goberno e ao Consello Social dos expedientes aprobados.

Por conseguinte, no marco da xestión e organización dos servizos económicos atribuída a esta Xerencia de acordo co artigo 50 da Lei Orgánica del Sistema Universitario 2/2023 e o artigo 90 dos Estatutos da USC, sobre a base do disposto nos apartados a) e i) do artigo 10 do Regulamento, pola presente

RESOLVO:

Primeiro. Plan de incorporación de remanentes

Aprobar o Plan secuencial para a incorporación dos remanentes de crédito procedentes do exercicio 2025, de acordo coa orde temporal e de prelación do respectivos expedientes de modificación aos que deran lugar que se indica no anexo I.

Segundo. Codificación das partidas

As partidas con remanente de crédito serán obxecto de incorporación nas partidas equivalentes que correspondan en función da clasificación orgánica, funcional e económica vixente no exercicio 2026.

Terceiro. Contías que se deben incorporar

A contía dos créditos incorporados será, como máximo, equivalente ao crédito dispoñible (entendido como o crédito total menos as obrigas contraídas) na data de finalización do exercicio económico de 2025.

Non procederá a incorporación cando o importe de crédito dispoñible sexa inferior a 200 euros.

Non procederá a incorporación de partidas “Z” agás para financiar reintegros de actividades subvencionadas e para imputar gastos realizados dos proxectos de investigación que resulten inelixibles. En casos excepcionais poderá realizarse unha solicitude para incorporar o importe destas partidas para os gastos derivados da contratación de persoal ou gastos imprescindibles que non poidan ser imputados a ningunha outra partida do orzamento en vigor, previa solicitude debidamente motivada.

Cuarto. Carácter da incorporación de créditos

A incorporación dos créditos mencionados terá carácter provisional ata a finalización das operacións de peche do exercicio 2025. Nese momento comunicáranse con carácter definitivo as partidas e contías dos créditos e realizáranse, de ser o caso, as operacións de axuste que sexan necesarias.

Quinto. Créditos procedentes de actividades de investigación finalizadas

Con carácter xeral, os créditos existentes logo da finalización de actividades de investigación deben destinarse ao financiamento de programas propios de investigación estruturais, específicos ou agrupados.

Para aquelas persoas investigadoras non integradas en programas propios de investigación (estruturais, específicos ou agrupados), poderán incorporarse os créditos ao exercicio 2026, previa solicitude motivada e a súa incorporación realizárase en partidas específicas e diferenciadas das de procedencia (para estes efectos transferiránselle os seus fondos a unha partida “Z”).

En ambos casos eses créditos destinaranse de forma exclusiva ao financiamento dos gastos seguintes:

- Custes derivados da contratación de persoal.
- Gastos que se autoricen para a formación do persoal contratado.
- Gastos de publicacións científicas
- Gastos derivados da asistencia a congresos e reunións científicas en xeral do persoal do programa ou grupo de investigación.

A solicitude do IP realizárase a través do seguinte formulario:

<https://forms.office.com/e/nxGQEERbBz?origin=lprLink>

Tanto os créditos de programas propios como os créditos de partidas “Z” serán empregados de oficio para financiar reintegros de actividades subvencionadas das persoas integrantes dos programas e para imputar gastos realizados durante a vida dos proxectos de investigación que resulten inelixibles.

Sexto. Realización doutros gastos con créditos incorporados de actividades de investigación finalizadas

A realización de gastos diferentes aos contemplados no punto anterior require unha autorización previa da Xerencia da USC.

A solicitude destas autorizacións tramitarase polo IP por medio do formulario indicado no punto quinto desta Resolución.

Sétimo. Calendario

As dotacións dos remanentes incorporaranse en SICUS no momento en que se realice a comunicación por parte do Servizo de Orzamentación e Planificación.

A comunicación definitiva da incorporación de créditos ao exercicio 2026 realizárase antes de finalizar o mes de febreiro.

A solicitude de incorporación de investigadores individuais prevista nos puntos terceiro e quinto deberá realizarse antes do 28 de febreiro de 2026.

Oitavo. Contías dos remanentes e posibilidades de aprazamento

As contías que se incorporarán ao exercicio 2026 para os bloques 1 a 6 corresponderá ao crédito dispoñible afectado a 31 de decembro de 2025. Para o resto dos bloques o importe a incorporar será o que permitan as dispoñibilidades orzamentarias, procurando que exista unha proporcionalidade entre o crédito sen executar a 31/12/2025 e o remanente de tesouraría do exercicio.

Para os bloques 7 a 9 inicialmente só se incorporará o importe do remanente existente cando non supere os 10.000 euros. Para importes superiores, incorporárase un 30% adicional sobre o importe que supere os 10.000 euros.

A incorporación do 70% restante realizarase tras a remisión polo responsable da partida da planificación da necesidade de gasto e a súa aprobación pola xerencia. Esta planificación remitirase mediante correo electrónico a area.economia@usc.gal

No caso das partidas “Z”, en base ao establecido nos puntos anteriores, inicialmente non se incorporará ningún importe.

En aplicación do principio de prudencia, para garantir a dispoñibilidade de crédito, dentro dos límites establecidos polo Regulamento, poderá aprazarse ata o exercicio 2027 a dispoñibilidade de certos créditos, procurando respectar as necesidades dos grupos de investigación para o exercicio 2026.

Noveno. Principio de prudencia

Dado o carácter provisional das cifras que se incorporen, os responsables dos créditos e as unidades de gasto terán a cautela de imputar unicamente aqueles compromisos de crédito que non

se poidan adiar ata a comunicación definitiva dos remanentes.

Décimo. Habilitación a Área de Economía

Facúltase a Directora da Área de Economía para coordinar as comunicacións de incorporacións de remanentes e a resolución de dúbidas, a través das instrucións operativas que sexan precisas.

Undécimo. Entrada en vigor.

A presente resolución entrará en vigor o día da súa publicación no taboleiro electrónico da Universidade de Santiago de Compostela.

Santiago de Compostela, 16 de xaneiro de 2026

O xerente,

Antonio Javier Ferreira Fernández

Anexo

Tipoloxía dos créditos	Bloque	Tipoloxía das partidas	Partidas específicas
Partidas de gasto con financiamento externo condicionado	1	Concepto económico 2* e 4*	Partidas de gasto con financiamento externo condicionado e continúan vixentes en 2026
	2	Concepto económico 641, 644, 647	Partidas de gasto con financiamento externo condicionado e continúan vixentes en 2026
	3	Concepto económico 640 (programas de incorporación de recursos humanos)	Programas de incorporación de recursos humanos que continúen vixentes en 2026
	4	Concepto económico 628	Fondos para a adquisición de infraestruturas de investigación, vixentes en 2026
	5	Concepto económico 642	Créditos con entidades externas, convenios e de actividades de prestación de servizos de I+D que financien actividades vixentes no exercicio 2026.
	6	Concepto económico 62 e 63	Axudas e convenios para a realización de infraestruturas non investigación vixentes en 2026
Actividades singulares de I+D finalizadas, de persoas investigadoras integradas en programas propios	7	Conceptos económicos 641, 642, 643, 644 ou 647	Créditos procedentes de financiamentos afectados, de actividades que finalizaron a 31/12/2025
Actividades singulares de I+D finalizadas, de persoas investigadoras non integradas en programas	8	Conceptos económicos 641, 642, 643, 644 ou 647	Créditos procedentes de financiamentos afectados, de actividades que finalizaron a 31/12/2025. Integración en partidas tipo "Z" previa solicitude e autorización.
Resto de partidas con cargo ao remanente xenérico de tesouraría	9	Calquera concepto económico	Créditos regulados no artigo 33.3 do Regulamento, na medida en que existan compromisos pendentes e sexa posible a súa incorporación

Sinatura dixital / Firma digital / Digital signature

Asinante/Firmante/Signer: DIANA SANTIAGO IGLESIAS,
SECRETARIA XERAL, UNIVERSIDAD DE SANTIAGO DE COMPOSTELA, 16/02/2026 09:49:57.

CSV: 899E-A2ED-408A-BFF1